



# NEWSLETTER

## OLIMPIJSKOG KOMITETA BiH

No.6 januar/februar 2021



### UVODNA RIJEČ POTPREDSJEDNIKA OK BiH

Dragi sportisti i sportski radnici,

Sa ponosom vam predstavljamo šesti Newsletter Olimpijskog komiteta BiH u kojem možete vidjeti pregled istaknutih aktivnosti namijenjenih sportistima, trenerima, sportskim strukovnim savezima BiH, kao i promociji olimpizma i olimpijskih vrijednosti u našem društvu, tokom prva dva mjeseca nove 2021. godine. Iako smo u trećem valu COVID-19 epidemije, optimistični smo i pripremamo se za čak 5 međunarodnih višesportskih takmičenja u narednih 16 mjeseci, što će predstavljati veliki organizacioni, proceduralni i finansijski izazov.

Uz sve okolnosti, vjerujemo i vrijedno radimo na tome da sve planirane aktivnosti budu realizovane na najvišem nivou. Svakako da je fokus prvo i najveće takmičenje - Olimpijske igre Tokio na kojima ćemo zasigurno učestvovati sa 5 takmičara uz realnu tendenciju da se taj broj uveća do zatvaranja kvalifikacionog sistema.

Paralelno sa navedenim nastavljamo naše aktivnosti na jačanju sportskog sistema BiH putem dostupnih online alata, u radu sa Međunarodnim i Evropskim olimpijskim komitetom i kroz širok spektar projektnog djelovanja.

Sportski strukovni savezi BiH čine sve da prebrode ovaj izuzetno zahtjevan period, a skorašnji rezultati i aktivnosti svjedoče njihov kvalitet rada u ovim nesvakidašnjim okolnostima.

Sportisti će uvijek biti naš prioritet, te i pored činjenice da je OK BiH udruženje građana, iznalazimo mogućnosti i znanje da trenutno stipendiramo 25 takmičara za OI Tokio 2020 i ZOI Peking 2022, kao i 11 mladih nada bh. sporta, koji se pripremaju za predstojeća takmičenja i kvalifikacije za Olimpijske igre.

U susret Olimpijskim igrama Tokio, želimo još jednom istaći MOK-ovu kampanju #JačiZajedno te napomenuti da je ovo vrijeme kada zajednički demonstriramo Olimpijske vrijednosti: izvrsnost, poštovanje i prijateljstvo koje su i u ovom periodu za čovječanstvo svjedočile svoj univerzalni značaj neophodan za uspješno prevazilaženje svih izazova. U sportu, kao i u životu je neprestana borba za napredak, za rezultate, za sportske i ljudske vrijednosti i ispravan put kojim hodimo!

*prof. dr Milanko Mučibabić*  
Potpredsjednik Olimpijskog komiteta BiH

## POTVRĐENO ODRŽAVANJE OLIMPIJSKIH IGARA TOKIO 2020



INTERNATIONAL  
OLYMPIC  
COMMITTEE

Međunarodni olimpijski komitet ponovo je izrazio odlučnost da će se najveće međunarodno višesportsko takmičenje održati ovog ljeta u japanskoj prestolnici.

Predsjednik Bach je istakao da Međunarodni olimpijski komitet zajedno sa Organizacionim odborom Olimpijskih igara Tokyo 2020 i Vladom Japana predano radi, te je u potpunosti posvećen uspješnoj organizaciji Olimpijskih i Paraolimpijskih igara. Planirane su sve dostupne kontramjere protiv epidemije COVID-19 kako bi sportisti i svi učesnici Igara bili sigurni.

Napominjemo da će se Igre održati od 23. jula do 08. avgusta 2021. godine.

## REZOLUCIJA UJEDINJENIH NACIJA O VAŽNOSTI OLIMPIJSKOG POKRETA I POZITIVNOG UTICAJA SPORTA

Tokom plenarnog sastanka Generalne skupštine, Ujedinjene nacije (UN) konsenzusom su usvojile rezoluciju kojom se potvrđuje uloga sporta kao globalnog akceleratora mira i održivog razvoja za sve, te u izgradnji globalne otpornosti u odnosu na rješavanje problema COVID-19.

Važno je što rezolucija prepoznaje uticaj koji je pandemija COVID-19 imala na sve aspekte sporta i potiče države članice UN-a da uključe sport i tjelesnu aktivnost u planove oporavka nakon COVID-19, kako bi sport i tjelesnu aktivnost integrisali u nacionalne strategije za održivi razvoj, uzimajući u obzir doprinose koje sport daje zdravlju, promovisanje sigurnog sporta kao doprinosa zdravlju i dobrobiti pojedinaca i zajednica. U isto vrijeme, rezolucija priznaje Olimpijsku povelju i načelo nediskriminacije, te „podržava nezavisnost i autonomiju sporta kao i misiju Međunarodnog olimpijskog komiteta u vođenju olimpijskog pokreta i Međunarodnog paraolimpijskog komiteta u vođenju paraolimpijskog pokreta.”



Tekst takođe potvrđuje „neprocjenjiv doprinos Olimpijskog i Paraolimpijskog pokreta u uspostavljanju sporta kao jedinstvenog sredstva za promicanje mira i razvoja, posebno kroz ideal Olimpijskog primirja.

Više o rezoluciji i ključnoj ulozi Olimpizma i sporta u društvu možete pročitati na [ovom linku](#).




## PRVI PRIRUČNIK MEĐUNARODNOG OLIMPIJSKOG KOMITETA SA SMJERNICAMA ZA SIGURNE OLIMPIJSKE IGRE TOKIO 2020

Međunarodni olimpijski komitet (MOK), Međunarodni paraolimpijski komitet (MPK) i Organizacioni odbor Tokio 2020 (TOKYO 2020) objavili su priručnik "Playbook", koji će biti vodilja za uspješne Olimpijske i Paraolimpijske igre Tokio.



Serijski Priručnik za OI Tokio pruža okvir osnovnih principa kojih će se svaka ključna skupina učesnika pridržavati prije putovanja u Japan, prilikom ulaska u Japan, tokom boravka na Igrama kao i tokom odlaska sa Igra. Oni će pružiti smjernice i postaviti parametre koji će omogućiti osobama i organizacijama da unaprijede svoje planiranje u ovoj fazi.



Mjere navedene u prvoj verziji Priručnika postupno će se nadograđivati tokom narednih sedmica, kako i kada se okolnosti promijene i budu donesene nove odluke. Informacije će se i dalje dijeliti, a ažurirani Priručnici očekuju se do aprila i juna 2021, pružajući više detalja koji će omogućiti učesnicima da pređu u sljedeću fazu planiranja.


Više o navedenim segmentima, kao i sam Priručnik možete pogledati na [ovom linku](#).

## OBILJEŽENA GODIŠNJICA ZIMSKIH OLIMPIJSKIH IGARA SARAJEVO 1984 I EYOF 2019 SARAJEVO & ISTOČNO SARAJEVO

Svake godine u februaru mjesecu bh. društvo sa posebnim ponosom evocira uspomene na 1984. godinu, sarajevsku olimpijadu koja je zvanično počela ceremonijom otvaranja 08. februara 1984. na stadionu Asim Ferhatović Hase. Samo dva dana nakon 35. godišnjice XIV Zimskih olimpijskih igara Sarajevo 1984, na istom mjestu, 2019-e godine svečano je otvoren XIV Zimski EYOF 2019 Sarajevo i Istočno Sarajevo. Prepuni stadion je trajno svjedočanstvo o Olimpijskom duhu koji decenijama živi u našem društvu i koji će trajno svjedočiti i baštiniti vrijednosti Olimpijskog naslijeđa.



U skladu sa mogućnostima ograničenim epidemijom COVID 19, ovog februara video prilogom obilježeno je 37 godina od ZOI Sarajevo 1984 i dvije godine od svečanog otvaranja EYOF 2019. Video obogaćen neobjavljenim video i foto materijalima Igara u kojem Predsjednik OK BiH gosp. Marijan Kvesić i bh. Olimpijci - Bibija Kerla i Tomislav Lopatić evociraju uspomene na ova dva događaja možete pogledati na [ovom linku](#).



## INTERAKTIVNI WEBINAR ZDRAVSTVENE KOMISIJE IK OK BIH

Zdravstvena komisija Izvršnog komiteta Olimpijskog komiteta Bosne i Hercegovine održala je interaktivni webinar na temu COVID-19 i vrhunski sport koji je bio namijenjen stipendistima OK BiH za OI Tokio 2020 i ZOI Peking 2022.



Nakon uvodnih predavanja, sportisti su učestvovali u diskusiji, te su kroz stručno izlaganje predavača razmijenjene informacije od ključnog značaja za vrhunski sport u odnosu na virus SARS-CoV-2. Pored članova Zdravstvene komisije, gostujući predavači prof. dr Aida Pilav i doc. dr Rusmir Baljić su predočili nova, aktuelna saznanja uz osvrt na prethodne informacije i iskustvo iz prakse. Predavači su kroz odgovore na pitanja razjasnili brojne nedoumice te predočili nove perspektive u pogledu same infekcije virusom, trenažnog procesa i vakcinacije kao najaktuelnije teme u ovom periodu. Video webinaru možete pogledati na [ovom linku](#).

■ 12 kanalni EKG u mirovanju i ultrazvuk srca  
◆ spirometrija  
✦ ergometrija (ergosprometrija)

Olimpijski komitet  
Bosne i Hercegovine

**SMJERNICE**

Nadzor od strane lekara i trenera  
(Subjektivni osećaj, RPE skala)

GRUPE	KUĆNO/BOLNIČKO LJEČENJE	DANI BEZ SIMPTOMA	POSTEPENI POVRATAK NA TEREN						POVRATAK NA TAKMIČENJE
			A	B	C	D	E	F	
1	Bez simptoma - 10 dodatnih COVID-19 testova	Najmanje 5 dana	5 dana	2 dana	1 dan	1 dan	2 dana	21. dan	
2	Blagi simptomi - 10 dodatnih COVID-19 testova	Najmanje 10 dana	10 dana minimum	2 dana	1 dan	1 dan	2 dana	33. dan	
3	Ublaženi simptomi - 10 dodatnih COVID-19 testova	Najmanje 10 dana	10 dana minimum	2 dana	1 dan	1 dan	2 dana	33. dan	
4	Teški simptomi - 14 dana izolacije	Najmanje 14 dana	14 dana	2 dana	1 dan	1 dan	2 dana	33. dan	
5	Kritični simptomi - 21 dana izolacije	Najmanje 21 dana	21 dana	2 dana	1 dan	1 dan	2 dana	33. dan	

Konsultacija infektologa, pulmologa, kardiologa, klubskog lekara, te potom odluka o daljnjem procesu povratka na teren (individualizirani multi-disciplinarni pristup).

Ako je test pozitivan, produžava se vrijeme izolacije, te sledi ponovno testiranje.  
Ako je test negativan, nastavlja se po protokolu RPE.

MSF: maksimalna srčana frekvencija

## OLIMPIJSKI KOMITET BiH UGOSTIO MINISTRA KULTURE I SPORTA KANTONA SARAJEVO SAMIRA AVDIĆA



Ministar kulture i sporta Kantona Sarajevo Samir Avdić je na poziv Predsjedništva OK BiH posjetio Olimpijski komitet Bosne i Hercegovine. Ministra Avdića su ugostili predsjednik OK BiH Marijan Kvesić, potpredsjednik OK BiH prof.dr Izet Rađo i generalni sekretar OK BiH dr sci. Said Fazlagić. Na sastanku se razgovaralo o unapređenju i intenziviranju saradnje u Olimpijskoj godini kao i realizaciji zajedničkih projekata. Poseban fokus razgovora je bio na projektima Evropske unije, a sve u cilju stvaranja boljeg ambijenta za sportiste, te jačanje sportskog sistema Kantona Sarajevo i Bosne i Hercegovine.

### IZVJESTAN NASTAVAK VIŠEDECENIJSKE SARADNJE OK BIH I BH TELECOMA



Na održanom sastanku između čelnika OK BiH i BH Telecoma iskazana je spremnost Generalnog direktora g. Kahrimana za nastavak podrške OK BiH u Olimpijskim godinama koje nam predstoje sa fokusom podrške na renomirana takmičenja OI Tokyo 2021 i OI Peking 2022, te Evropskim igrama u Krakovu 2023. godine.

G. Kahriman je izrazio opredjeljenost društveno odgovorne kompanije BH

Telecom da i u ovim teškim trenucima za bh. kompanije prouzrokovane COVID-19 pandemijom, podrži najbolje bh. sportiste i OK BIH u ostvarenju njihove misije i uzvišenih Olimpijskih ciljeva, a sve za dobrobit bh. društva i građana.

## EDIN NUMANKADIĆ ČUVAR USPOMENA NA SARAJEVSKU OLIMPIJADU, OTIŠAO U ZASLUŽENU PENZIJU

Sa punim pravom i ponosom možemo reći čuvar uspomena na sarajevsku Olimpijadu 1984. godine. Pored svog životnog poziva i opredjeljenja kao međunarodno poznati likovni umjetnik, Edin je većinu svog radnog vijeka proveo u ulozi direktora Muzeja XIV Zimskih olimpijskih igara u Sarajevu.

Naš dragi Edo je skoro 4 decenije vrijedno radio na promociji i očuvanju najljepših momenata naše prošlosti, starajući se da sjećanje na Olimpijsko naslijeđe BiH i Olimpijski duh nastavi da živi u srcima svih Bosanaca i Hercegovaca. Edo je također na prijedlog Olimpijskog komiteta BiH 2013. godine bio dobitnik prestižne nagrade "Pjer de Kuberten" Međunarodnog olimpijskog komiteta.

Olimpijski komitet BiH se zahvaljuje Edinu na dosadašnjem radu i zalaganju, te čestita na zasluženom odlasku u penziju, kako bi mogao uživati u plodovima svoga rada i druženju sa unucima. Cijeli tekst i fotogtafije pogledajte [ovde](#).



## PROGRAM MLADIH OLIMPIJSKIH AMBASADORA



Program je pokrenut od strane Evropskih olimpijskih komiteta i za cilj ima da ojača Olimpijske vrijednosti među mladim sportistima koji se takmiče na EYOF-u.

Ovaj program ulaže u mlade ljude, koji su inspirisani sportom i Olimpijskim vrijednostima i imaju želju da doprinesu stvaranju jakih temelja međunarodne sportske zajednice, zasnovanom na Olimpijskim vrijednostima. Tokom održavanja EYOF-a 2021 Voukatti ovaj program će se održati po četvrti put pod pokroviteljstvom Komisije za Olimpijsku kulturu i naslijeđe EOK-a.

Čast da, u ovom izdanju programa, predstavlja Bosnu i Hercegovinu ima naša stonoteniserka Emina Hadžiahmetović, koja je krajem 2020. godine od strane EOK-a izabrana u program u funkciji promotera. Glavne aktivnosti promotera su da stvaraju kulturološke programe promovirajući na taj način kulture država članica EOK-a. Njeno gostovanje, gdje priča o samom programu možete pogledati na [ovom linku](#).

# SPORTSKI SAVEZI BiH

## NOGOMETNI/FUDBALSKI SAVEZ BOSNE I HERCEGOVINE



U cilju što bolje pripreme za nastavak prvenstva Nogometni/Fudbalski savez Bosne i Hercegovine je organizovao seminare za službena lica našeg elitnog fudbalskog takmičenja.

U „Kući fudbala“ u Sarajevu održan seminar za delegate m:tel Premijer lige, na kojem je analiziran rad nakon prvih 19 kola takmičenja. Delegati su odradili i kontrolni test iz propisa NS/FS BiH, a jedna od tema seminara se odnosila na Uputstvo o vršenju dužnosti delegata i izrada izvještaja delegata sa utakmice, te na Plan mjera i procedura za COVID-19.

U hotelu „Hills“ na Ilidži održani su seminari za sudije i posmatrače suđenja Premijer lige, a održan je i online seminar za medicinske službenike m:tel Premijer lige Bosne i Hercegovine.

Više o seminaru možete pročitati na [ovom linku.](#)

## BOKSERSKI SAVEZ BOSNE I HERCEGOVINE - FORMIRA SE REGIONALNA BOKSERSKA LIGA, POČINJE DO KRAJA APRILA

Predsjednici bokzerskih saveza šest zemalja okupili su se u petak u Beogradu, gdje je zvanično potpisana Deklaracija o pokretanju Regionalne lige u boksu, uz prisustvo Umara Kremleva, predsjednika Svjetske bokzerske federacije.

Regionalna bokzerska liga počet će ove godine, a okupljat će bokzerske klubove iz Bosne i Hercegovine, Crne Gore, Hrvatske, Sjeverne Makedonije, Slovenije i Srbije.

U dokumentu koji je potpisan ističe se kako je cilj unaprijediti regionalnu i međunarodnu saradnju kroz oblast sporta, koji ima značajnu ulogu u promociji kulture dijaloga, tolerancije i međusobnog razumijevanja.

Takođe, liga ima za cilj povratak regionalnih klubova koji imaju dugu tradiciju, a koji su iznjedrili evropske, svjetske i olimpijske prvake, kao što su Željezničar, Radnički, Partizan, Crvena zvezda, Pula, Dinamo iz Zagreba, Budućnost-Podgorica.

“Liga će sigurno biti nada za boksera iz BiH, ali i iz cijelog regiona. Ona će okupljati najkvalitetnije boksera, pružati im priliku da se dokažu. Istovremeno će to biti i jedna vrsta probne stanice za boksera na njihovom putu prema Evropi i svijetu”.



Kroz formiranje Regionalne bokzerske lige cilj je doprinijeti podizanju kvaliteta klupskog boksa i promocija boksa na regionalnom nivou, prije svega kroz lansiranje Grand Prix turnira, čiji će cilj biti integrisanje postojećih turnira u sklopu jedinstvenog i zajedničkog brenda. Ono što je također značajno jeste da su obezbijeđeni i TV prenosi ovog takmičenja.

Kroz uspostavljanje Regionalne lige i turnira Grand Prix, kao njene završne godišnje komponente, cilj je doprinijeti jačanju pojedinačnih, ali i zajedničkih pozicija u okviru Međunarodne bokzerske asocijacije, ističe se između ostalog u deklaraciji.

## SKIJAŠKI SAVEZ BOSNE I HERCEGOVINE



U Skijaškom savezu Bosne i Hercegovine je izuzetno aktivan period. Savez je u tekućoj sezoni 2020/2021 održao niz takmičenja u BiH, uprkos epidemiji COVID-19, što je izuzetan organizacioni uspjeh. Pored domaćih, održana su i takmičenja međunarodnog karaktera. Ono što je najvažnije jeste da su svi događaji protekli poštujući sve trenutne

epidemiološke mjere na snazi, te u sigurnom okruženju za sve učesnike.

Najznačajnija dosadašnja takmičenja u ovoj sezoni su:

### **ALPSKO SKIJANJE**

FIS CUP Jahorina – testna trka za Evropa kup	23-24.01.2021.
FIS CUP Majnex – Državno Juniorsko prvenstvo BiH	26.01.2021.
FIS CUP BH TELECOM – Državno prvenstvo BiH	30-31.01.2021.
FIS CHI KUP Djeca za mir u svijetu	21-24.02.2021.

### **SKI TRČANJE**


Balkan cup	19-20.02.2021.
------------	----------------

### **BIATLON**

Prvi regionalni IBU kup	02-05.02.2021.
-------------------------	----------------

### **SNOWBOARD**

FIS CUP Bjelasnica	29.01-01.02.2021.
--------------------	-------------------



## GIMNASTIČKI SAVEZ BOSNE I HERCEGOVINE

Gimnastički savez BiH je 06.02.2021. na prijedlog trenera iz GS FBiH i GSRS organizovao prvo okupljanje potencionalnih reprezentativki Juniorskih i Seniorskih RG selekcija u Franjevačkoj klasičnoj Gimnaziji –Visoko. Dok je 13. i 14.02.2021. godine u Univezitetском Kampusu u Banja Luci, održan je dvodnevni seminar za trenere Ritmičke gimnastike. Predavač seminara bila je prof.dr Snežana Bijelić.



Pored navedenog, obavljene su sve logističke i završne pripreme za održavanje Prvenstva BiH u Ženskoj i Muškoj Sportskoj gimnastici u mjesecu aprilu 2021. godine u Banja Luci. Tehnički organizator Prvenstva je G.K."Spartak" iz Banja Luke.

## ATLETSKI SAVEZ BOSNE I HERCEGOVINE

Atletski savez je 2021. godinu otpočeo organizacijom više takmičenja:

- Dvoransko prvenstvo za starije kategorije 06. i 07. februara u Olimpijskoj dvorani Juan Antonio Samaranch, Zetra
- Dvoransko prvenstvo za mlađe kategorije 20. i 21. februara u Olimpijskoj dvorani Juan Antonio Samaranch, Zetra
- Kup u bacačkim disciplinama 28. Februara na Atletskom centru AK Sarajevo



Pored učešća na navedenim domaćim takmičenjima, naši atletičari su nastupali i na međunarodnoj sportskoj sceni, a rezultate naših sportista pročitajte u sekciji BH Team.


Naredni međunarodni nastup će imati atletičari Amel Tuka, Mesud Pezer i Abedin Mujezinović koji su ispunili normu za učešće na Evropskom dvoranskom prvenstvu koje je na programu 05-07. marta u poljskom gradu Torun.

## INICIJATIVA ZA RAZVOJ STRELIČARSKOG SPORTA U BIH

Potpredsjednik OK BiH prof.dr Izet Rađo primio je u radnu posjetu mr.sci. Edina Krupaliju člana Izvršnog komiteta OK BiH i Kenana Čamparu, predsjednika streličarskog kluba „Vekkas“ iz Sarajeva, koji je ujedno aktivni takmičar i trener. Na sastanku se razgovaralo o afirmaciji i unapređenju streličarskog sporta na nivou Bosne i Hercegovine kao i drugim temama koje će rezultirati unapređenjem sportskog sistema BiH.



## SAMBO SPORT BIH - Sjajan nastup bh. sambista na Svjetskom prvenstvu u Novom Sadu



Bosna i Hercegovina je po prvi put u historiji imala predstavnike u borilačkom sportu Sambo i to na Svjetskom Sambo prvenstvu za mlađe juniore, juniore i odrasle. Naši sambo takmičari su imali čast da budu pozvani od g. Sergeja Eliseeva (Predsjednik Evropske Sambo Federacije) i g. Dmitry Maximova (Sportski direktor Internacionalne Sambo Federacije) i da predstave BiH na svjetskom prvenstvu.

U kategoriji juniora do 82kg BiH je predstavljao Srđan Ajvaz, koji je osvojio sjajno 7. mjesto. U kategoriji mlađih juniora BiH je imala dva takmičara, Domagoja Jozeljića u kategoriji do 81kg, koji je također zauzeo sjajno 7. mjesto i Domagoj Pušića, koji je nastupao u kategoriji do 75kg i plasirao se među 9 najboljih u svijetu.

Sambo je sovjetska borilačka vještina nastala spajanjem nekolicine tradicionalnih vještina kavkaskih i sibirskih naroda, uz dodatak jiu-jitsu. Treba naglasiti da se već neko vrijeme razmatra da ovaj sport postane Olimpijski, te bi se kao takav uvrstio i u sportski program ljetnih Olimpijskih igara.

## BH TEAM | REZULTATI



### LEJLA TANOVIĆ SEDMA NA SVIJETU

Lejla Tanović nakon posljednjeg upisa bodova na UCI rang-listi trenutno zauzima 7. mjesto na svijetu. Skok na UCI rang-listi desio se nakon osvojenog 8. mjesta na Svjetskom prvenstvu u Turskoj prošle godine, što je ujedno i najbolji rezultat za bh. biciklizam.

Ovo je najbolja sezona naše najbolje biciklistkinje. Čestitamo Lejli i želimo da nastavi nizati izvanredne uspjehe!

### SJAJNA SEZONA ZA BIH SKIJAŠE! ISTORIJSKI USPJEH ELVEDINE MUZAFERIJE I EMIRA LOKMIĆA

Elvedina Muzaferija je otvorila sezonu nastupom na Evropa Cup-u, gdje je ujedno osvojila i prve bodove ove sezone. Na trci u superveleslalomu u švicarskom Zinalu Elvedina je osvojila 3 boda. Trku je završila na 28. mjestu. Nakon Evropa Cup-a Elvedina je nastupila Crans Montani na utrci spusta i zauzela 35. mjesto, sa manje od 3 sekunde zaostatka za pobjednicom, što za našu skijašicu predstavlja jako dobar rezultat.

Na Jahorini se 23. i 24. januara održao FIS CUP Jahorina 2021 u disciplini slalom. Najuspješniji je bio naš alpinac Emir Lokmić, koji je osvojio 2 puta zlatnu medalju. Naš drugi reprezentativac Marko Šljivić osvojio je 2. mjesto u drugom danu. U ženskoj konkurenciji je naša Maja Tadić prvi dan osvojila 2. mjesto, dok je drugi dan naša mlada skijašica Nikolina Dragoljević zauzela 2. mjesto.



*Bh. skijaši*



*Marko Šljivić*

Odlične rezultate krunisali su nastupi Elvedine i Emira na Svjetskom prvenstvu u Cortina d'Ampezzo, Italija. Oba takmičara ostvarila su historijske uspjehe za bh. skijanje. Elvedina je u disciplini spust zauzela 25. mjesto, a u disciplini alpska kombinacija 16. mjesto. Emir je također imao sjajne rezultate u disciplini veleslaloma gdje je zauzeo 28. mjesto, u konkurenciji sa preko 200 takmičara.



*Elvedina Muzaferija*



*Emir Lokmić*

Predstavnici bh. skijaškog trčanja Sanja Kusmuk, Stefan Anić, Miloš Čolić, Strahinja Erić, Sara Plakalović i Miloš Stević trenutno su u njemačkom Oberstdorfu na Svjetskom prvenstvu u ski trčanju.



## VRHUNSKI REZULTATI BH. ATLETIČARA NA SAMOM POČETKU GODINE

Naši atletičari su počeli sa takmičenjima i pripremama za odlazak na Olimpijske igre Tokyo 2020.

Amel Tuka, koji je već kvalifikovan za OI Tokyo 2020, je otvorio sezonu sa nastupom u Padovi, Italija. Na utrci na 400m osvojio je prvo mjesto. Ovo je bila Amelova prva utrka i ujedno i priprema za predstojeću sezonu i Olimpijske igre Tokyo 2020.

Naš najbolji bacač kugle i također već kvalifikovani atletičar za OI Tokyo 2020 Mesud Pezer je nastupio na Seniorskom atletskom prvenstvu Balkana u Istanbulu, gdje je zauzeo 2. mjesto.

Abedin Mujezinović je također nastupio na Seniorskom atletskom prvenstvu Balkana u Istanbulu i zauzeo 3. mjesto.



Najveći uspjeh u početku ove sezone ostvario je Amel Tuka, koji je nastupio na atletskom mitingu u Madridu. Amel je osvojio 2. mjesto i trku završio vremenom 1:45.95. Ovim vremenom Amel je oborio dugogodišnji državni i balkanski rekord u dvorani.

## ADA AVDAGIĆ 1. MJESTO NA SVJETSKOJ RANG LISTI



Ada Avdagić, reprezentativka Bosne i Hercegovine i članica Taekwondo kluba Sarajevo rangirana je na prvo mjesto rang liste WTE rankinga u kategoriji juniora do 42 kilograma.

## ISTORIJSKI USPJEH MIRZE NIKOLAJEVA



Mirza Nikolajev je ove sezone ispisao historiju sankoškog sporta u BiH i maestralno završio svoju prvu sezonu u seniorskoj konkurenciji.

Kao junior nastupio je u seniorskoj konkurenciji i kvalifikovao se na svih 9 trka Svjetskog kupa, također, ušao je i u 4 superfinala, gdje je vozio u konkurenciji sa mnogobrojnim osvajačima Olimpijskih medalja, pobjednika svjetskih kupova i svjetskim prvacima.

U generalnom poretku Svjetskog kupa plasiran je na 34. mjesto od ukupno 57 takmičara iz 24 zemlje osvojivši 75 bodova.

## ŽENSKA REPREZENTACIJA U KOŠARCI SE NAKON 22 GODINE PLASIRALA NA EVROPSKO PRVENSTVO



Bosna i Hercegovina se prvi put poslije 1999. godine kvalifikovala na Eurobasket, koji će se od 17. do 27. juna održati u Španiji i Francuskoj. Košarkašice su odigrale odlične kvalifikacije i svojim nastupom na Eurobasketu osigurale 2. mjesto u grupi.

Olimpijski komitet BiH upućuje iskrene čestitke svim igračicama, trenerima, stručnom štabu, kao i Košarkaškom savezu BiH.

## EVROPSKO PRVENSTVO U BRZOM KLIZANJU

Seniorski reprezentativci Bosne i Hercegovine u brzom klizanju, Edin Branković i Tarik Omeragić, nastupili su od 22. do 24. januara na Evropskom prvenstvu u Gdanjsku (Poljska), u disciplinama 500m, 1000m i 1500 m. U konkurenciji 45 najboljih brzoklizača Evrope naši reprezentativci imali su solidan nastup. Edin Branković je na 1500 m ušao u polufinale i zauzeo 16. mjesto, što je odličan rezultat. Na 1000 m, Tarik je sa vremenom 1:31.578 zauzeo 41. mjesto, ali je u ovoj disciplini također popravio lični rekord za 3 sekunde. U ukupnom plasmanu na ovom Evropskom prvenstvu, Edin je plasiran na 35., a Tarik na 38. mjesto.

Tarik Omeragić će nastupiti na Svjetskom prvenstvu u Dordrechtu (Nizozemska), od 5. do 7. marta ove godine. Uz podršku Saveza klizačkih sportova BiH oputovao je u Celje (Slovenija), gdje će trenirati do 28.02., kada odlazi na završne pripreme u Dordrecht.



Tarik Omeragić



Edin Branković



## EU PROJEKTI

### OK BIH REALIZUJE DVA NOVA ERASMUS + SPORT PROJEKTA

U okviru Erasmus + sport programa, Olimpijski komitet Bosne i Hercegovine učestvuje u realizaciji dva nova projekta: „SPORT for RULES“ – Sharing positive values through the enhancement of the referee's role” i “MLEA - Micro Learning Entrepreneurship for Athletes”

Projekat “Sport4Rules” ima za cilj da širi pozitivne vrijednosti kroz poboljšanje sudijske uloge, i vrijednovanja sudija kao osoba koje kontrolišu igru i garantuju poštovanje pravila i sigurnosti sportista. Glavne teme ovog projekta su borba protiv nasilja, rasizma, diskriminacije i nepoštivanja pravila u sportu.

Ovaj projekat Olimpijski komitet Bosne i Hercegovine realizuje zajedno sa Odbojkaškim savezom Italije (koordinator projekta) i partnerima: Ministarstvo za omladinu i sport (Bugarska), Međunarodni savez za sportska službena lica, Odbojkaški savez Hrvatske, Odbojkaški savez Turske, Teniski savez Italije, Košarkaški savez Francuske i Univerzitet u Sevilji (Španija).




Prvi sastanak partnera je organizovan 29.01.2021. godine putem dostupnih online alata, a realizacija projekta će trajati 18 mjeseci. Više informacija o projektu možete pronaći [ovdje](#).

Projekat MLEA ima za cilj promovisati edukaciju u i kroz sport sa posebnim fokusom na razvoj vještina, kao i podržati implementaciju EU smjernice za Dualne karijere sportista. Također, stvaranje kurikuluma o poduzetništvu za sportiste i bivše sportiste, koji će se distribuirati kroz online platforme i MLEA webstranicu.

Ovaj projekat Olimpijski komitet BiH realizuje zajedno sa Zagrebačkom školom ekonomije i menadžmenta (koordinator projekta), i partnerima: Visoka poslovna škola za menadžment Otto Beisheim (Njemačka), Stiftelsen Institut za istraživanje (Švedska), Hrvatski olimpijski odbor, Olimpijski komitet Srbije i Olimpijski komitet Slovenije. Prvi sastanak partnera je organizovan 10.02.2021. godine putem dostupnih online alata, a realizacija projekta će trajati 24 mjeseca. Više informacija o projektu možete pronaći [ovdje](#).

## ONLINE EDUKACIJA O DRUŠTVENOM PODUZETNIŠTVU SENTA



U sklopu realizacije Erasmus + sport projekta “SENTA - Sportisti postaju društveni poduzetnici”, koji se sufinansira sredstvima Evropske unije, Olimpijski komitet Bosne i Hercegovine objavio je poziv za učešće u SENTA online edukaciji. Poziv je bio otvoren za sve vrhunske i bivše sportiste koji žele naučiti nešto više o društvenom poduzetništvu u sportu.

SENTA online edukacija posebno je kreirana za sportiste i po principu gemifikacije. Sadržaj edukacije je namijenjen za sportiste koji aktivno rade na svojoj dualnoj karijeri, ili možda pak za one koji žele početi graditi svoju dualnu karijeru u sportu.

Teme koje su obuhvaćene SENTA online edukacijom su :

- *Kako postati “Društveni poduzetnik u sportu”*
- *Zašto su “Sportisti odlični društveni poduzetnici”*
- *Društveni poduzetnik kao “pokretač promjena u društvu”*
- *Kako planirati svoju karijeru – “Od teorije do prakse”*
- *Kreirajte “društveno – poslovni” model*
- *Budite u toku sa “novim tehnologijama” i uspješno ih primijenite u svom poslovnom poduhvatu*

Već sada na SENTA platformi vrijedno uče naši vrhunski i bivši sportisti zajedno sa sportistima iz sedam EU zemalja. Po uspješno položenom SENTA online kursu svi učesnici će dobiti Certificate, čija prigodna dodijela će biti organizovana u martu 2021. godine. Projekat SENTA će sa svojom realizacijom zvanično završiti 31.03.2021. godine. Ovim će Olimpijski komitet Bosne i Hercegovine uspješno završiti četvrti Erasmus + sport projekat.

## EVROPSKA SEDMICA SPORTA



Olimpijski komitet Bosne i Hercegovine već četvrtu godinu organizuje obilježavanje Evropske sedmice sporta. Podsjećamo da se Evropska sedmica sporta obilježava diljem Evrope sa ciljem povećanja svijesti o važnosti aktivnog načina života. Prvi put obilježena je 2015. godine, i iz godine u godinu, Evropska sedmica sporta okuplja sve veći broj učesnika.

Olimpijski komitet BiH je ove godine pripremio mnoštvo iznenađenja i događaja kojim će se obilježiti Evropska sedmica sporta, te podstaći što veći broj ljudi da budu fizički aktivni. Posebno je potrebno naglasiti da u vrijeme COVID-19 restriktivnih mjera, koje neminovno utiču kako na fizičko, tako i na psihičko zdravlje, bavljenje sportom i fizičkom aktivnošću znatno pospješuje zdravstveno stanje.

Kao i svake godine, Olimpijski komitet BiH je izabrao ambasadore Evropske sedmice sporta, te u 2021. i 2022. godini vježbajte i ostanite aktivni zajedno sa Lejlam Tanović i Lanom Pudar.

Stoga, pratite naše društvene mreže putem kojih ćemo dijeliti korisne informacije, pokušati da Vas motivišemo da se bavite fizičkom aktivnošću kroz razne nagradne igre i događaje, i ne zaboravite **#BEACTIVE!**

## INTERVJU SA **ELVEDINOM MUZAFERIJOM**



**OK BiH:** *Elvedina, koji su tvoji utisci nakon historijskog rezultata za bh. skijanje?*

**Elvedina Muzaferija:** Naravno da sam jako sretna sa svojim rezultatom što je ujedno i historijski rezultat za bh. skijanje i to mi je samo još veći podstrek da nastavim vrijedno trenirati i da očekujem još bolje rezultate.

**OK BiH:** *Kako izgleda takmičenje u doba COVID-19 restrickija?*

**EM:** Tok takmičenja u skijanju je skoro pa ostao isti. S obzirom na trenutne mjere, prije svakog takmičenja moramo raditi COVID-19 testiranje. Jedina velika promjena, koja nama skijašima najviše fali je publika, ali se svi nadamo da će se i to ubrzo promijeniti.



**OK BiH:** *S obzirom na to da se takmičarska sezona bliži kraju, kako će izgledati tvoje pripreme tokom ljeta?*

**EM:** Nakon završetka sezone imat ćemo dvije sedmice pauze i odmah počinjemo sa priprema u Austriji ili Švicarskoj na glečerima. Potrudit ćemo se da ove godine imamo što više dana na snijegu i skijanja, jer su pred nama Zimske olimpijske igre u Pekingu 2022, te se nadam da ću u sezonu ući u što boljoj formi.

**OK BiH:** *Šta su tvoji planovi i ciljevi za narednu sezonu, uoči održavanja ZOI Peking 2022?*

**EM:** Naredne sezone je plan da pratimo čitav kalendar Svjetskog kupa, te da osvajanjem bodova na tim takmičenjima stvorim sebi priliku za što boljim startnim brojem na ZOI Peking 2022, a onda i najbolji rezultat do sada u mojoj karijeri i za BiH u alpskom skijanju na Olimpijskim igrama.

## ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:  
(klikom na ikone)



©2021. Olimpijski komitet Bosne i Hercegovine. Sva prava zadržana.  
[www.okbih.ba](http://www.okbih.ba)

Specijalnu zahvalnost dugujemo sponzorima i partnerima OK BiH.  
Klikom na logo posjetite njihove oficijelne stranice.



## IN MEMORIAM

**ZLATAN SARAČEVIĆ**  
Banja Luka, 05. 07.1961.



Olimpijske medalje

SEUL 1988  
bronzana

**Rukomet**

**Klubovi**

- Borac Banja Luka, Zamet Rijeka
- Medveščak, Badel - Zagreb
- Veszprem Mađarska
- Bordo, Nim, Creteil, Istres - Francuska

Saračević je rođen u Banjoj Luci 5. jula 1961. godine, a od 1977. do 1987. godine je nosio dres Borca s kojim je osvojio prvenstvo Jugoslavije 1981. i Kup 1979. godine. Bio je jedan od najboljih desnih bekova u historiji rukometa, a sa reprezentacijom Jugoslavije osvojio je Svjetsko prvenstvo 1986. i Olimpijske igre u Seulu 1988. godine. U dresu Jugoslavije dao je 200 golova u 145 odigranih utakmica.



Sa velikom tugom i žaljenjem smo se oprostili sa Zoranom Miličevićem učesnikom Ol Atina 2004.g., i jednim od najtrofejnijih trenera BiH koji je ostavio neizbrisiv trag u stonoteniskom sportu. Zoran je stvarao nove generacije mladih igrača koji su postizali zapažene rezultate na pojedinačnim i ekipnim takmičenjima u BiH i na međunarodnom nivou.



Posljednji pozdrav istaknutom bh. atletičaru Osmanu Junuzoviću, uputio je Olimpijski komitet Bosne i Hercegovine predvođen Predsjedništvom OK BiH i Izvršnim komitetom OK BiH. Iskreno saučešće porodici mladog atletičara, njegovom matičnom klubu i Atletskom savezu Bosne i Hercegovine.



Olimpijski komitet Bosne i Hercegovine izražava iskreno saučešće porodici nekadašnje rukometne bh. reprezentativke Adele Merdžanić, njenom matičnom klubu te Rukometnom savezu Bosne i Hercegovine.